



KOSOVO SPECIALIST CHAMBERS  
DHOMAT E SPECIALIZUARA TË KOSOVËS  
SPECIJALIZOVANA VEÇA KOSOVA

**Numri i lëndës:** KSC-BC-2020-04  
**Prokurori kundër Pjetër Shalës**

**Vendosi:** Gjykatësi i Procedurës Paraprake  
Gjykatës Nikola Giju

**Administratore:** Dr. Fidelma Donlon

**Data:** 20 dhjetor 2021

**Gjuha:** Anglishte

**Klasifikimi:** Publik

---

**Urdhër për Caktimin e Datës së Konferencës së Pestë mbi Ecurinë e Çështjes dhe për Parashtrime**

---

**Prokurorit të Specializuar**

Xhek Smith

**Mbrojtësit të akuzuarit**

Zhan-Lui Zhilisen

**GJYKATËSI I PROCEDURËS PARAPRAKE**,<sup>1</sup> në përputhje me nenin 39(1) dhe (13) të Ligjit nr. 05/L-053 për Dhomat e Specializuara dhe Zyrën e Prokurorit të Specializuar (“Ligji”) dhe rregullën 96(1) të Rregullores së Procedurës dhe të Provave para Dhomave të Specializuara të Kosovës (“Rregullorja”), nxjerr urdhrin e mëposhtëm.

## I. HISTORIKU PROCEDURAL

1. Më 19 qershor 2020, në vijim të vendimit të Gjykatësit të Procedurës Paraprake,<sup>2</sup> Prokurori i Specializuar paraqiti Aktakuzën e Konfirmuar.<sup>3</sup>
2. Më 16 mars 2021, pas vendimit dhe fletarrestimit të lëshuar nga Gjykatësi i Procedurës Paraprake,<sup>4</sup> Pjetër Shala (“z. Shala”) u arrestua në Mbretërinë e Belgjikës (“Belgjika”).<sup>5</sup>

---

<sup>1</sup> KSC-BC-2020-04, F00001, Kryetarja, *Vendim për Caktimin e Gjykatësit të Procedurës Paraprake*, 14 shkurt 2020, publik.

<sup>2</sup> KSC-BC-2020-04, F00007, Gjykatësi i Procedurës Paraprake, *Vendim mbi Konfirmimin e Aktakuzës kundër Pjetër Shalës*, 12 qershor 2020, rreptësisht konfidencial dhe *ex parte*. Versioni i redaktuar konfidencial dhe versioni i redaktuar publik u nxorën më 6 maj 2021, F00007/CONF/RED dhe F00007/RED.

<sup>3</sup> KSC-BC-2020-04, F00010, Prokurori i Specializuar, *Parashtrim i Aktakuzës së Konfirmuar*, 19 qershor 2020, publik, me shtojcën 1, rreptësisht konfidenciale dhe *ex parte*, dhe shtojcën 2, konfidenciale. Versioni konfidencial me më pak redakte dhe versioni publik i redaktuar më tej i Aktakuzës së Konfirmuar u dorëzuan më 31 mars 2021, F00016/A01, konfidencial, F00016/A02, publik. Versioni konfidencial me edhe më pak redakte i Aktakuzës së Konfirmuar u dorëzua më 25 maj 2021, F00038/A01. Pas vendimit të Gjykatësit të Procedurës Paraprake mbi mocionin e Mbrojtjes që kundërshton formën e Aktakuzës së Konfirmuar, më 1 nëntor 2021, u dorëzua një aktakuzë e korrigjuar, F00098/A01, konfidenciale; dhe më 16 nëntor 2021 u dorëzua versioni i redaktuar publik i aktakuzës së korrigjuar, F00107/A01.

<sup>4</sup> KSC-BC-2020-04, F00008, Gjykatësi i Procedurës Paraprake, *Vendim mbi Kërkesën për Lëshimin e Fletarrestimit dhe Urdhrit të Transferimit*, 12 qershor 2020, konfidencial. Versioni i redaktuar publik u nxor më 6 maj 2021, F00008/RED. F00008/A01, Gjykatësi i Procedurës Paraprake, *Fletarrestim për z. Pjetër Shala*, 12 qershor 2020, rreptësisht konfidencial dhe *ex parte*. Versioni i redaktuar publik u nxor më 15 prill 2021, F00008/A01/RED.

<sup>5</sup> KSC-BC-2020-04, F00013, Administratorja, *Njoftim i Arrestimit sipas Rregullës 55(4)*, 16 mars 2021, publik.

3. Më 15 prill 2021, me përfundimin e procedurave gjyqësore në Belgjikë, z. Shala u transferua në objektin e paraburgimit të Dhomave të Specializuara në Hagë, Holandë.<sup>6</sup>
4. Më 30 prill 2021, Gjykatësi i Procedurës Paraprake nxori Vendimin Kornizë mbi Nxjerrjen e Provave dhe Çështje të Lidhura me To (“Vendimi Kornizë”).<sup>7</sup>
5. Më 15 nëntor 2021, u mbajt konferenca e katërt mbi ecurinë e çështjes.<sup>8</sup>

## II. DISPOZITAT LIGJORE PËRKATËSE

6. Sipas Nenit 21(6) të Ligjit, i gjithë materiali dhe provat ose faktet relevante në zotërim të ZPS-së, të cilat janë në favor ose kundër të akuzuarit, i vihen në dispozicion të akuzuarit para fillimit të procesit dhe gjatë tij, dhe u nënshtrohen vetëm atyre kufizimeve që janë rreptësisht të nevojshme dhe atëherë kur zbatohen garancitë mbrojtëse kompensuese të nevojshme. Në bazë të rregullës 102(3) të Rregullores, ZPS-ja i jep njoftim të hollësishëm Mbrojtjes për çdo material dhe provë që ka në zotërim.
7. Sipas rregullës 95(5) të Rregullores, pas dorëzimit të materialeve sipas rregullës 95(4) të Rregullores, Gjykatësi i Procedurës Paraprake fton Mbrojtjen të dorëzojë dosjen paraprake brenda një afati të përcaktuar. Gjithashtu, brenda një afati të përcaktuar nga Gjykatësi i Procedurës Paraprake, Mbrojtja informon ZPS-në mbi synimin e vet për të përdorur alibinë ose çfarëdo arsye tjetër që përjashton përgjegjësinë penale, ndër të cilat aftësia mendore e kufizuar ose mungesa e aftësisë mendore, intoksikimi, domosdoshmëria, shtrëngimi dhe gabimet faktike ose ligjore.

---

<sup>6</sup> KSC-BC-2020-04, F00019, Administratorja, *Njoftim për Pranimin e Pjetër Shalës në Objektin e Paraburgimit të Dhomave të Specializuara dhe për Caktimin me Kusht të Mbrojtësit*, 15 prill 2021, konfidencial, para. 2, me shtojcat 1-2, konfidenciale. Versioni i redaktuar publik u nxor më 26 prill 2021, F00019/RED.

<sup>7</sup> KSC-BC-2020-04, F00033, Gjykatësi i Procedurës Paraprake, *Vendim Kornizë mbi Nxjerrjen e Provave dhe Çështje të Lidhura me To*, 30 prill 2021, publik.

<sup>8</sup> KSC-BC-2020-04, F00101, Gjykatësi i Procedurës Paraprake, *Urdhër për Ndryshimin e Afateve të Kërkesave për Leje dhe Caktimin e Datës së Konferencës së Katërt mbi Ecurinë e Çështjes dhe për Parashtrime*, 5 nëntor 2021, publik (“Urdhri i datës 5 nëntor 2021”), para. 15, 19(c). Konferenca e parë, e dytë dhe e tretë mbi ecurinë e çështjes u mbajtën përkatësisht më 23 prill 2021, 21 qershor 2021 dhe 23 shtator 2021.

8. Në bazë të rregullës 96(1) të Rregullores, në vijim të konferencës së parë mbi ecurinë e çështjes pas paraqitjes së parë të akuzuarit, Gjykatësi i Procedurës Paraprake, nëse e gjykon të nevojshme, mbledh konferenca mbi ecurinë e çështjes për: (i) organizimin e shkëmbimeve mes palëve dhe, kur është e zbatueshme, mbrojtësit të viktimave, për të mundësuar përgatitje të shpejtë për gjykim; (ii) ndërmarrjen e hapave që mundësojnë çdo përgatitje të nevojshme prej palëve në mënyrë të zellshme dhe në kohë; dhe (iii) rishikimin e ecurisë së çështjes gjyqësore dhe për t'u dhënë palëve, e kur është e zbatueshme mbrojtësit të viktimave, mundësinë e ngritjes së problemeve në lidhje me çështjen gjyqësore.

9. Sipas rregullës 96(2) të Rregullores, me pëlqimin me shkrim të të akuzuarit që jepet pas këshillimit me mbrojtësin, konferenca mbi ecurinë e çështjes mund të mbahet: (i) në praninë e të akuzuarit dhe me pjesëmarrjen e mbrojtësit nëpërmjet videokonferencës; ose (ii) në praninë e mbrojtësit dhe me pjesëmarrjen e të akuzuarit nëpërmjet videokonferencës; ose (iii) në mungesë të të akuzuarit me praninë e mbrojtësit, ose më pjesëmarrjen e mbrojtësit nëpërmjet videokonferencës. Gjithashtu, çdo kërkesë për pjesëmarrje në konferencën mbi ecurinë e çështjes nëpërmjet videolidhjes i bëhet drejtpërdrejt Administratores, në përputhje me Udhëzuesin e Punës të Zyrës Administrative për Videolidhjet (KSC-BD-23/COR), paraprakisht e në kohë të mjaftueshme, në mënyrë që Administratorja të ndërmarrë hapat e duhur, ndër të cilat informimi i Gjykatësit të Procedurës Paraprake.

### III. DISKUTIM

10. Pas shqyrtimit të mendimeve të shprehura nga palët në lidhje me datën e mbajtjes së konferencës së pestë mbi ecurinë e çështjes në çështjen gjyqësore aktuale,<sup>9</sup> Gjykatësi i Procedurës Paraprake vendos që konferenca e pestë mbi ecurinë e çështjes të mbahet të premtën, më 14 janar 2022, në orën 14:30.

---

<sup>9</sup> KSC-BC-2020-04, Transkripti, 15 nëntor 2021, publik ("Transkripti i datës 15 nëntor 2021"), f. 134.

11. Gjykatësi i Procedurës Paraprake do t'u kërkojë palëve të japin informacion të përditësuar, nëse kanë, në lidhje me pikat ende të pazgjidhura të specifikuara në rendin e ditës të konferencës së katërt mbi ecurinë e çështjes,<sup>10</sup> dhe të bëjnë parashtrime me shkrim dhe me gojë në lidhje me ato pika.<sup>11</sup> Gjithashtu, Gjykatësi i Procedurës Paraprake do t'u kërkojë palëve informacion të përditësuar për pikat e mëposhtme:

(1) Nxjerrja e materialit

(a) A mundet Zyra e Prokurorit të Specializuar ("ZPS") të konfirmojë se nuk do të kundërshtojë rëndësinë materiale të asnjë prej materialeve të kërkuara nga Mbrojtja e z. Shala ("Mbrojtja") në përputhje me rregullën 102(3) të Rregullores, dhe se i ka dhënë Mbrojtjes qasje në të gjitha materialet që: (i) nuk kanë nevojë për redaktim deri më 3 dhjetor 2021 (ose brenda katër javësh nga kërkesa e Mbrojtjes); dhe/ose (ii) kanë nevojë për redaktime standarde deri më 17 dhjetor 2021 (ose brenda gjashtë javësh nga kërkesa e Mbrojtjes);<sup>12</sup>

(b) A ka ende prova shfajësuese në ruajtjen, kontrollin apo dijeninë faktike të ZPS-së, të cilat duhet t'i nxirren Mbrojtjes në pajtim me rregullën 103 të Rregullores, dhe a synon ZPS-ja të dorëzojë ndonjë kërkesë për masa mbrojtëse në lidhje me to;

(c) A ka bërë përparim ZPS-ja në procesin e nxjerrjes së materialeve që janë objekt i kufizimeve sipas rregullës 107 të Rregullores; a synon ZPS-ja të dorëzojë një kërkesë për një njoftim shtesë në përputhje me rregullën 102(3)

---

<sup>10</sup> Urdhri i datës 5 nëntor 2021, para. 16.

<sup>11</sup> KSC-BC-2020-04, F00102, Prokurori i Specializuar, *Parashtrime të Prokurorisë për Konferencën e Katërt mbi Ecurinë e Çështjes*, 9 nëntor 2021, konfidenciale (versioni i redaktuar publik u nxor në të njëjtën ditë, F00102/RED); F00106, Prokurori i Specializuar, *Parashtrime në Përputhje me Urdhrin e Gjykatësit të Procedurës Paraprake të Datës 5 Nëntor 2021 në lidhje me Konferencën e Katërt mbi Ecurinë e Çështjes*, 10 nëntor 2021, publike.

<sup>12</sup> KSC-BC-2020-04, F00090, Gjykatësi i Procedurës Paraprake, *Vendim në lidhje me Kërkesën për Ndryshim Afati të Kërkesës së Mbrojtjes sipas Rregullës 102(3)*, 19 tetor 2021, publik, para. 16, 18(b).

të Rregullores në lidhje me këtë material;<sup>13</sup> dhe a parashikon ZPS-ja që do të duhet të dorëzohet kërkesë për masa mbrojtëse për çdo nxjerrje të një materiali të tillë;

(d) A mundet Mbrojtja të bëjë të ditur nëse, në përputhje me rregullën 95(2)(e) të Rregullores, kundërshton ose synon të kundërshtojë pranueshmërinë e cilitdo materiali provues të nxjerrë në bazë të rregullës 102 të Rregullores;

(e) A po përballen apo parashikojnë të përballen palët me ndonjë vështirësi në lidhje me procesin e nxjerrjes së materialeve të përcaktuar në Vendimin Kornizë.

(2) Përkthimet

(a) A kanë bërë palët ndonjë kërkesë për t'i dhënë përparësi përkthimit të parashtrimeve apo materialeve të veçanta provuese, dhe a janë hasur vështirësi në lidhje me çështje të tilla;

(b) A kanë arritur palët ndonjë marrëveshje për përkthimin e materialeve provuese ose pjesëve të tyre, përveç deklaratave të dëshmitarëve të cilët ZPS-ja synon t'i thërrasë për të dëshmuar në gjykim, në përputhje me Vendimin Kornizë.<sup>14</sup>

(3) Hetimet e ZPS-së dhe hapat e mëtejshëm

(a) A ka bërë ZPS-ja një vlerësim nëse ka nevojë për hapa të mëtejshëm hetimorë dhe, nëse po, a mund të konfirmojë ZPS-ja se hapa të tillë kanë përfunduar ose do të përfundojnë përpara dorëzimit të dosjes së saj paraprake;<sup>15</sup>

(b) A pritët të ketë ndonjë problem me afatin e 28 janarit 2022 për dorëzimin e dosjes paraprake të ZPS-së dhe materialit përkatës në përputhje me rregullën

---

<sup>13</sup> Transkripti i datës 15 nëntor 2021, f. 113, rreshtat 23-25.

<sup>14</sup> Vendimi Kornizë, para. 67; Transkripti i datës 15 nëntor 2021, f. 117, rreshti 22 – f. 120, rreshti 24.

<sup>15</sup> Transkripti i datës 15 nëntor 2021, f. 121, rreshtat 20-25.

95(4)(a)-(c) të Rregullores, dhe/ose me afatin e 11 shkurtit 2022 për dorëzimin e tabelës së ZPS-së sipas rregullës 109(c).<sup>16</sup>

(4) Hetimet e Mbrojtjes dhe hapat e mëtejshëm

(a) Bazuar në vlerësimet e ZPS-së dhe procesin në vijimësi të nxjerrjes së materialeve (që planifikohet të vazhdojë të paktën deri në janar 2022), a mund të japë Mbrojtja më shumë informacion mbi statusin e hetimeve të saj, synimin për të bërë kërkesa lidhur me mundësitë hetimore unike, në përputhje me rregullën 99(1) të Rregullores, dhe për kohën që ajo parashikon se do t'i duhet për të përfunduar hetimet e saj;

(b) a mund të japë Mbrojtja më shumë informacion në lidhje me synimin e vet për të përdorur alibinë ose arsye që përjashtojnë përgjegjësinë penale sipas rregullës 95(5) të Rregullores dhe çdo nxjerrje shoqëruese të materialeve sipas rregullës 104(1) dhe (2) të Rregullores;

(c) a parashikon Mbrojtja dorëzimin e dosjes paraprake dhe materialeve përkatëse sipas rregullës 95(5) të Rregullores dhe, nëse po, kur mendon se do të jetë në gjendje t'i dorëzojë ato.

(5) Pikat juridike dhe faktike për të cilat palët pajtohen

(a) a kanë bërë përparim palët në diskutimet e tyre në lidhje me mundësinë për të paraqitur pikat juridike dhe/ose faktike për të cilat pajtohen, në përputhje me rregullat 95(3) dhe 156 të Rregullores;<sup>17</sup>

(6) Paraburgimi

---

<sup>16</sup> KSC-BC-2020-04, Transkripti, 23 shtator 2021, publik, f. 92, rreshtat 10-20.

<sup>17</sup> Transkripti i datës 15 nëntor 2021, f. 124, rreshtat 5-20.

(a) A ka ndryshuar ndonjë nga masat për zbutjen e rrezikut nga KOVID-19 që nga përditësimi i pestë i Zyrës Administrative në lidhje me këto masa.<sup>18</sup>

12. Gjykatësi i Procedurës Paraprake urdhëron më tej ZPS-në dhe Mbrojtjen që jo më vonë se ora 16:00 e përkatësisht datës 11 janar 2022 dhe 12 janar 2022, të dorëzojnë parashtrime me shkrim për cilëndo nga pikat e parashtruara në paragrafin 11 të këtij urdhri (sipas rastit), si dhe për temat e diskutuara gjatë konferencës së katërt mbi ecurinë e çështjes, për çfarëdo pike tjetër në lidhje me sa më lart që nuk është përfshirë në rendin e ditës së konferencës së katërt dhe të pestë mbi ecurinë e çështjes, për çfarëdo vështirësie të hasur lidhur me nxjerrjen e materialit provues, apo për çfarëdo pike tjetër që ka lidhje me to.

#### IV. VENDIM

13. Për arsyet e lartpërmendura, Gjykatësi i Procedurës Paraprake:

(a) **VENDOS** të mbajë konferencën e pestë mbi ecurinë e çështjes, në prani të ZPS-së dhe Mbrojtjes, të **premtën, më 14 janar 2022, në orën 14:30;** dhe

(b) **URDHËRON** ZPS-në dhe Mbrojtjen që (sipas rastit), deri në orën 16:00 të përkatësisht ditës së **martë, 11 janar 2022 dhe të mërkurës, 12 janar 2022,**

---

<sup>18</sup> KSC-BC-2020-04, F00119, Administratorja, *Përditësim i Pestë i Parashtrimit të Administratores në Përputhje me Rregullën 23(2) mbi Masat për Zbutjen e Rrezikut nga KOVID-19*, rreptësisht konfidencial dhe *ex parte*, 1 dhjetor 2021.



të dorëzojnë parashtrime me shkrim në lidhje me pikat e parashtruara në paragrafët 11 dhe 12 të këtij urdhri.

/nënshkrimi/

**Gjykatësi Nikola Giju**  
**Gjykatës i Procedurës Paraprake**

E hënë, 20 dhjetor 2021

Në Hagë, Holandë.